

# **Жинларнинг одамлар жисмига таъсири борми?**



09:11 / 31.10.2018 5700

**Баъзи ёмон жинларнинг одамларга таъсири бўлиши мумкин, дейишади уламоларимиз.**

Бунда кўпроқ одамнинг ўзи айбдор бўлади. Жинлар одамлардан ўзлариға ишонганлариға, васвасага учганлариға, хаёлида турли салбий ҳолатларни ўйлаб юрганлариға, жинлардан ёрдам сўраганлариға, Аллоҳ таолонинг зикридан ва Қуръони карим тиловатидан ғофил бўлганлариға, жинлардан сақланиш учун ўқилиши лозим бўлган дуоларни ўқимай юрганлариға тегиши мумкин. Расууллоҳ соллаллоҳу алайҳи ва саллам бизларга жинлардан сақланиш йўлларини ўргатганлар.

Абу Ҳурайра розияллоҳу анҳудан ривоят қилинади:

**«Расууллоҳ соллаллоҳу алайҳи васаллам мени Рамазон закотини қўриқлашга вакил қилдилар. Бирор келиб, егуликдан ҳовучлаб ола бошлади. Мен уни тутиб олдим-да, «Аллоҳга қасамки, сени албатта Расууллоҳ соллаллоҳу алайҳи васалламга олиб чиқаман», дедим. У: «Мен ҳожатмандман, бола-чақам бор. Қаттиқ муҳтоҗлигим бор», деди. Мен уни қўйиб юбордим.**

**Тонг отди. Набий соллаллоҳу алайҳи васаллам:**

**«Эй Абу Ҳурайра, бу кеча асириңг нима қилди?» - дедилар.**

**«Эй Аллоҳнинг Расули, қаттиқ муҳтожлиги ва бола-чақаси борлигидан шикоят қилган эди, раҳмим келиб, қўйиб юбордим», дедим. У зот:**

**«Билиб қўй, у сени алдабди. Ҳали яна келади», дедилар. Мен Расууллоҳ соллаллоҳу алайҳи васалламнинг «Ҳали яна келади» деган сўзларидан унинг қайтиб келишини билиб, уни пойладим. Келиб, егуликдан ҳовучлаб ола бошлаган эди, уни тутиб олдим. «Сени албатта Расууллоҳ соллаллоҳу алайҳи васалламга олиб чиқаман», дедим. У: «Мени қўйиб юбор, чунки мен муҳтожман, бола-чақам бор. Энди қайтиб келмайман», деди. Унга раҳмим келиб, қўйиб юбордим.**

**Тонг отди. Расууллоҳ соллаллоҳу алайҳи васаллам менга:**

**«Эй Абу Ҳурайра, асириңг нима қилди?» дедилар. Мен:**

**«Эй Аллоҳнинг Расули, қаттиқ муҳтожлиги ва бола-чақаси борлигидан шикоят қилган эди, раҳмим келиб, қўйиб юбордим», дедим. У зот:**

**«Билиб қўй, у сени алдабди. Ҳали яна келади», - дедилар. Уни учинчи марта пойладим. Келиб, егуликдан ҳовучлаб ола бошлаган эди, уни тутиб олдим. «Сени албатта Расууллоҳ соллаллоҳу алайҳи васалламга олиб чиқаман. Сен «Қайтиб келмайман», - деб, учинчи марта қайтиб келяпсан», дедим. У:**

**«Мени қўйиб юбор, Аллоҳ сенга манфаат берадиган калималарни ўргатаман», деди. «Нима у?» - дедим. У: «Қачон тўшагингга кирсанг, Оятул-Курсий «Аллоҳу лаа илаҳа илла ҳувал-ҳайюл-қойюм»ни бошидан бошлаб тугатгунингча ўқи. Шунда тонг оттиргунингча Аллоҳ томонидан устингда бир қўриқчи бўлади ва шайтон сенга яқинлаша олмайди», - деди. Уни қўйиб юбордим.**

**Тонг отди. Расууллоҳ соллаллоҳу алайҳи васаллам менга:**

**«Бу кеча асириңг нима қилди?» дедилар. Мен:**

**«Эй Аллоҳнинг Расули, Аллоҳ менга манфаат берадиган калималарни ўргатишини айтган эди, қўйиб юбордим», дедим. У зот:**

**«Улар нима экан?» дедилар.**

**«У менга: «Қачон түшагингга кирсанг, Оятул-Курсий - «Аллоҳу лаа илаха илла ҳувал-ҳайюл-қойюм»ни бошидан бошлаб тугатгунингча ўқи», деди ва менга: «Тонг оттиргунингча Аллоҳ томонидан устингда бир қўриқчи бўлади ва шайтон сенга яқин-лаша олмайди», деб айтди», дедим». Улар (саҳобалар) яхшиликка энг ўч кишилар эди. Шунда Набий соллаллоҳу алайҳи васаллам:**

**«Билиб қўй, ўзи ғирт ёлғончи бўлса ҳам, сенга рост айтибди. Уч кечадан бери ким билан гаплашаётганингни биласанми, эй Абу Ҳурайра?» дедилар.**

**«Йўқ», дедим. У зот:**

**«У шайтон эди», дедилар».**

*Имом Бухорий ривоят қилган.*

Пайғамбар соллаллоҳу алайҳи васалламдан Фалақ ва Ан-Нас сураларини ўқиб, дам солиб юриш ҳақида кўплаб ривоятлар ворид бўлган. Ан-Нас сурасининг ўзида жинларнинг ёмонлигидан паноҳ сўраш очиқ-оидин айтилган.

Анас розияллоҳу анҳудан ривоят қилинади:

**«Набий соллаллоҳу алайҳи васаллам халога кирсалар, «Аллоҳумма аъзу бика минал хубуси вал хобаиси» (Аллоҳим, Сендан эркагу урғочи ифлослар(шайтонлар)дан паноҳ тилайман), дер эдилар».**

*Имом Бухорий, Муслим, Абу Довуд, Термизий, Насаий ривоят қилишган.*

Ушбу дуони хало очиқ жойда бўлса, қазои ҳожатга тайёрланаётган вақтда, маҳсус жойда бўлса, унга киришдан олдин ўқиш керак. Чунки Пайғамбаримиз соллаллоҳу алайҳи васаллам бу дуони доимо ўқир эдилар.

Эркак ва урғочи шайтонлардан паноҳ тилашнинг ҳикмати шуки, одатда хало жойида Аллоҳнинг номи зикр этилмагани учун эркак-урғочи шайтонлар у жойни ўзига қароргоҳ қилиб олган бўлади. Аллоҳдан паноҳ сўрамай кирган одамга зарар етказишлари мумкин. Шунинг учун ушбу ҳадисдаги дуони ёдлаб олиб, халога киришдан олдин ўқишни одатга айлантириш ҳар бир киши учун зарурдир.

**“Фолбинлик, сөхграрлик, жин чиқариш ва  
ноанънавий даволаш каби ишларнинг ҳақиқати” китобидан**